



Luis Coray (a san.) retschaiva il Premi da reconuschientscha da cusseglier guvernativ Martin Jäger.



Chant da bellezza d'Astrid Alexandre.

FOTOS G. N. STGIER

«Sun stà surstà da retschaiver quel premi»

Il chantun ha surdà 18 premis a personas meritavlas

DA GION NUTEGN STGIER / ANR

■ **In premi principal, nov premis da reconuschientscha ed otg premis da promoziun. Quai ha surdà cusseglier guvernativ Martin Jäger venderdi a personas che lavuran sin il champ cultural. Tuts purtaders dals premis conferman la vasta multifariadad culturala en noss chantun.** Sco adina è er quest onn s'entupada ina societat illustra en la sala dal cussegl grond per assister a la surdada dal Premi da cultura 2015 al cienast *Christian Schocher* e per la surdada dals ulteriurs premis. La sala dal cussegl grond è uschia daventada per intginas uras in local cultural ed in vair lieu da festa. Da la partida a l'occurrentza culturala èn er stads numerus confamigliars da las purtaders e dals purtaders dals divers premis. L'entira raspada è vegnida beneventada da cusseglier guvernativ *Martin Jäger*. Il vestgì musical a la surdada dals premis han dà cun *Astrid Alexandre*, *Bettina Herrmann*, *Balzer Collenberg* e *Markus Majoleth* gist quatter talents da musica e chant che han retschet in premi da promoziun.

Valurs culturalas individualas

La libertad da la cultura saja in bain da gronda valur, ha ditg il schef dal departament da cultura *Martin Jäger*. Il chantun Grischun haja fitg bleras personas che sajan activas sin il champ cultural e che represchentan er nosa multifariadad culturala. La cultura professiunala vivia en noss

chantun, dentant er la cultura da laics ed er quella saja da sustegnair, ha ditg *Martin Jäger*. Cun grond engaschi vegnan stgaffidas valurs culturalas individualas e quellas enritgeschan ferm noss chantun, ha menziunà il cusseglier guvernativ. Ina incumbensa dal chantun saja lura er da promover la cultura.

Grazia a mes bun team

La regenza grischuna ha surdà il Premi grischun da cultura 2015 dotà cun 30 000 francs a *Christian Schocher*, il cienast da Puntraschna. El ha survegnì il premi en apprezzaziun da sia ovra da la vita sco artist che ha influenzà ed enritgì il film svizzer dal Grischun anora cun films documentars engaschads e cun films dramatics stinads. *Christian Schocher* ha er manà durant 45 onns il Kino Rex a Puntraschna e realisà intgins films per Radiotelevision Svizra Rumantscha. El è sa mussà ventiraivel dad avair retschet quel premi e saja stà surstà dad avair survegnì quel. Sia lavur saja dentant be stada pussaivla grazia a las bleras personas che hajan collavorà cun el, ditg auter in team fitg serius e fidà. La laudatio per *Christian Schocher* ha tegnì *Peter Egloff*.

Da Laax fin Samedan

Undradas cun in Premi da reconuschientscha, dotà mintgin cun 20 000 francs, èn vegnidas nov personas. Tranter quellas sa chattan er diversas personas rumantschas. *Linard Candreia* da Casti e s'ent a Laufen ha retschet in Premi da ren-

conuschientscha per sia activitad publicistica multifara en favur da lingua e cultura e per sias prestaziuns sco autur da litteratura populara rumantscha. *Luis Coray* da Laax è vegnì undrà per sia activitad artistica autentica, en spezial per sias prestaziuns sco chantautur pionier, sco pedagog da malegiar e sco pictur artist. In Premi da reconuschientscha ha er retschet *Chasper Pult* da Pasqual per ses engaschament passiu e multifar per la cultura e per sia activitad creativa en favur da la plurilinguitad e da la convivenza da las culturas. *David Sontòn Calfisch* da Trin retschaiva in Premi da reconuschientscha per sia activitad engaschada sco fundatur e manader artistic da l'ensemble ò! e da sias prestaziuns excellentas sco cumponist e musicist che ha mess l'accent sin la musica nova. Er *Marianne Fischbacher* da Glion è vegnida undrada e quai per ses engaschament per il mantegniment e per l'intermediaziun da la ritga cultura da la Surselva e da sia lavur perseveranta per ils museums e per ils archivs culturalas en il Grischun. Onur er per *Ursina Lardi* da Samedan en apprezzaziun da sia prestaziun sco artista variada e flexibla che vegn reconuschida en Svizra ed a l'exteriur per sia represchentanza en il film e sin tribuna. Premis da promoziun han retschet: *Astrid Alexandre*, musicista, *Micha Bietenhader*, artist figurativ, *Balzer Collenberg*, musicist, *Anja Konzett*, schurnalista, *Bettina Herrmann*, chantadura, *Markus Majoleth*, musicist, *Francesca Nussio*, istorichera, *Pia Valär*, illustratura.



Conuschan bain la cultura grischuna: Giovanni Netzer, Arnold Spescha e Gion Duno Simeon (da san.).



Ils geniturs d'Ursina Lardi han preni encunter il premi da lur figlia: Bernardo ed Angela Lardi e Martin Jäger (da san.).



Linard Candreia cun trais da sias anteriuras scolaras: Durana Derungs, Gabriela Derungs e Bernardet Arpagaus (da dretg).



Gratulaziun da Gion Gieri Tuor per Bettina Herrmann.